

冲庵顧先生撫遼奏議

冲菴顧先生撫遼奏議卷之十四

通州 益卿顧養謙著

疏

改協守分信地以便責成

題為議改協守分信地以便責成事據整飭寧前
兵備山東按察司僉事王邦俊呈蒙臣憲牌依
蒙卷查寧前原舊止設叅將一員備禦二員兩
衛城所邊堡驛舖俱聽叅將統屬嘉靖四十一
年因中後所地方虜賊不時入犯攻陷錦川營
堡東關驛蒙督視遼東軍情兵部葛侍郎題奉

欽依將寧遠備禦移駐中左所又於中後所添設遊擊一員抽拔各城堡官軍二千一百員名駐劄該所應援寧前一帶尚無專責一切偵探哨報收保修守猶責成於叅將隆慶四年該前道任僉事議為畫地分守以專責成事將叅將原屬前屯一衛中前中後二所鐵場等十堡高嶺沙河二驛及寧遠中右所提調原屬黑莊窠堡并腹裏東關驛共城堡一十七處俱割屬中後所遊擊管轄其前屯備禦掌印提調守堡守驛等官俱聽節制寧前叅將改為寧遠叅將止管寧

遠一衛中左中右二所仙靈寺等十堡連山等
二驛共一十五處俱題奉

明旨撰給專

勅各欽遵管理萬曆六年六月內又為議處修工未
用

帑銀以便清查事蒙巡撫周都御史案驗准兵部
咨該本部議照寧前地方極衝將領兵遊擊楊
五典右營遊擊王大璋各兵馬駐劄寧遠適中
防修邊工兼備東西應援題奉

欽依備行前道李叅政遵將領兵營兵馬分駐寧遠

中右所右營兵馬分駐前屯城各修防萬曆七年三月內又為專責成以便防禦事蒙巡撫周都御史憲牌備行前道李叅政議將寧遠叅將中後所遊擊各原屬城堡與領右二遊擊及各備禦提調暫分信地內寧遠城并松山寺灰山寨兒山白塔谷興水縣五堡曹莊驛共七處分屬寧遠叅將中右所并仙靈寺小團山二堡共三處分屬領兵遊擊中左所并楸木衝長嶺山沙河三堡連山驛共五處分屬中左所備禦前屯城并背陰障三山平川瑞昌高臺五堡及高

嶺沙河二驛共八處分屬右營遊擊及前屯備
禦中後所并三道溝新興錦川黑莊窠四堡東
關驛共六處分屬中後所遊擊鐵場永安二堡
分屬中前所提調官各照信地督理哨防以上
城所驛堡一應僉軍買馬應行事宜與備禦提
調掌印等官仍聽寧前叅遊總為統攝通詳允
示遵行外今該本道王僉事悉心咨訪其事體
委有未妥者蓋緣地方名雖分守而統轄尚屬
寧前叅遊領右二將體統未定故無論軍馬事
務即傳報虜情俱赴寧前叅遊其領右二將不

得與聞是以主客之勢各殊而秦越之視不能免也一遇地方有事難以責成相應題

請換給

勅書庶為穩便本道酌量地方衝緩及兵馬強弱各分信地如寧遠叅將應分寧遠衛曹莊驛松山寺堡灰山堡寨兒山堡白塔谷堡興水縣堡及雙樹舖中左所備禦應分中左所連山驛檉木衝堡長嶺山堡沙河堡及高橋舖本官仍屬叅將管轄領兵遊擊應分中右所仙靈寺堡小團山堡黑莊寨堡及曲尺河舖改名中右所遊擊

前屯遊擊應分中後所東關驛沙河驛三道溝
堡新興營堡錦川營堡高臺堡及雙墩鋪改名
中後所遊擊右營遊擊應分前屯衛高嶺驛三
山營堡平川營堡瑞昌堡背陰障堡及石河鋪
改名前屯遊擊前屯備禦似應移駐中前所該
分中前所永安堡鐵場堡及八里鎮遠二鋪仍
聽今改前屯遊擊管轄以上四將所屬官軍錢
糧一應事務各照所分地方管理不得侵越至
於各地方若有大舉入寇及大工興作不能獨
當者聽本道呈請酌量調遣策應協濟不得以

分地為辭如此庶體統正而各得行其事責成專而各自盡其力有利無害事可經久前屯備禦既移駐中前所其所統兵馬共一千名皆前屯土著就與前屯遊擊統轄即於遊擊兵內調操者撥五百名連本所軍五百名足原額一千之數與備禦統領似為兩便等因到臣又准鎮守總兵官寧遠伯李成梁手本照得寧前地方逼臨關輔勢屬要衝苗虜時肆竊發道路多梗兵馬馳應迂遠趨奔靡及故議設前屯遊兵駐中後所右營遊兵駐前屯衛領兵遊營駐中右

所聯絡接應若常山然比年宵備謹嚴防禦得
濟近復分隸邊堡各有專屬無容再議但封疆
之任必殫壓有據而後節制可一節制之寄必
等威有辨而後事權攸重今照寧前設有四將
畫地分守責專一區一旦有警小竊固各衛一
方而大舉則彼此觀望又或哨有的確形聲可
以移易駐防者道傍築室其誰適從似非所以
籌邊計而圖萬全也茲議欲將前屯右營遊擊
改為西路協守副總兵一應禮節悉照遼陽東
路協守事體其寧遠叅將領兵營中後所二遊

擊中前所中左所二備禦俾聽節制兵馬不外
增添營伍俱仍舊貫凡虜情軍機副總兵從便
調度庶戰守防禦統紀得有專責事權彈壓緩
急不失機宜其於地方未必無補矣隨行准寧
前兵備道王僉事手本回稱寧前極衝今前屯
右營議改協守彈壓兩衛地方有賴等因到臣
案照先為孤鎮危急直陳利弊大端以裨安攘
萬一事准兵部咨該山西道監察御史陳登雲
題條陳一款重將權以控要地該本部覆議今
後河東各路大小功罪副總兵同其賞罰緩急

應援副總兵悉行調度中有諉以非我信地及有不奉將令用命者許副總兵同該道一一查叅此則事權既重法令自行所裨孤遠封疆者非眇小矣其副總兵楊燮所請關防一節聽撫按官酌議施行又一款改統轄以便責成該本部覆議查得右營舊駐廣寧移駐前屯自通年始非制也故凡補軍買馬俱赴廣寧驗印及它月糧賞賜亦赴廣寧支給行之非一日矣據議查照領兵營事例將該營遊擊換給

勅書常川駐劄前屯一應軍馬糧賞改屬寧前兵備

是衝地既可以添兵而長途且免於奔命誠為
一舉兩得之策但中間事體有無窒礙人情可
否通融當此更置之初須為經久之計合行該
鎮督撫官會議具

奏以憑覆

請定奪等因題奉

欽依備咨前來准此行據前任分守遼海東寧道兼
理邊備右叅議傅霖呈照得全遼以三岔河分
東西河西逼近

京薊故以撫鎮駐劄廣寧統轄全遼河東控禦東

西二虜故以副總兵駐劄遼陽且近年題奉
欽依加以協守名色盖有懲於河東叅遊向無節制
嘗至僨事也顧邇年來加銜之將領日增等威
之辨別無序號令難行功罪不與協守則亦空
名而已今議欲重將權以控要地誠為有見合
無將副總兵楊燮比照薊門協守

請給關防以重副將之權凡各路不拘加銜副將并
叅遊等官悉聽節制調度中有諉以非我信地
及不奉將令者許副總兵同本道一一查叅其
河東邊事等項功罪協守與諸將共之如此不

惟將權可重而各路之觀望推諉者咸知有所
警戒矣等因到臣該臣會同總督薊遼保定等
處軍務兼理糧餉都察院右都御史兼兵部右
侍郎張

鎮守總兵官太保兼太子太保寧
遠伯李成梁巡按山東監察御史許守恩議照
設將守邊其責成貴專其事權貴一責不專則
觀望而無固志權不一則渙散而靡同心非武
之善經也寧前以一線地西通山海蓋全遼之
咽喉也其地勢南逼海而北逼邊自邊至海遠
者數十里近不過二十餘里而已而邊外之虜

若董狐狸長鼎諸酋巢穴最近歲為寧前患無寧日先是則甯有失陷城堡之事故移廣寧遊兵右營及領兵營將士分駐寧前各領修防之責然二營皆當視緩急入衛薊鎮之兵當時止令暫駐寧前寧前稱客兵故第為援而無信地若謂事寧可撤也而寧前事無寧期故遂令二營兵常駐寧前以其常駐寧前也後稍分之信地使兩遊擊各分寧前兩叅遊遘事之責失事則各以所分地罪兩客將而地方官軍實屬主兵叅遊如故兩客將往往不心服而所分地又

遠近勞逸未均且未經題

請主客觀望難以責成是以僉事王邦俊有分信地之議議甚均平可守臣故曰責成貴專然四將雖各有分地而體統不相轄必不能人人有同心而若身臂指之相使首尾中之相應也故鎮臣有改協守之議所以一人心而重事權於寧前最便臣故曰事權貴一也為今之計應將右營遊擊改為西路協守副總兵駐劄前屯而以前屯衛高嶺驛三山營堡平川營堡瑞昌堡背陰障堡石河鋪為信地前屯備禦移駐中前所

而以本所及永安堡鐵場堡八里鎮遠二舖為
信地專聽協守管轄前屯遊擊駐中後所即改
為中後所遊擊而以本所及東關驛沙河驛三
道溝堡新興營堡錦川營堡高臺堡雙墩舖為
信地領兵遊擊駐中右所即改為中右所遊擊
而以本所及仙靈寺堡小團山堡黑莊窠堡曲
尺河舖為信地寧遠叅將以寧遠衛及曹莊驛
松山寺堡灰山堡寨兒山堡白塔谷堡興水縣
堡雙樹舖為信地寧遠備禦駐中左所而以本
所及連山驛椴木衝堡長嶺山堡沙河堡高橋

舖為信地仍屬叅將管轄以上各官各照所分
地一切哨探修防軍馬錢糧事務俱屬寧前道
轄理協守副總兵禮節悉照遼陽東路協守事
體寧遠叅將中右中後所二遊擊中前中左所
二備禦俱聽節制調度若薊鎮灤東有急副總
兵仍酌量選調各營兵馬入援其右營今改協
守副總兵前屯今改中後所遊擊領兵今改中
右所遊擊各

勅書俱

請換給東西二路協守副總兵俱比照薊門事例一

體

請給關防以重其權又查前屯備禦移駐中前所應
將本營兵馬一千就便與副總兵統領即於副
總兵營內調操者撥五百名赴所連本所軍五
百名共足一千額數與備禦統領以免一千土
著播遷之勞至於副總兵衙宇并供應已有遊
擊成規如或崇卑豐儉不同并操司官軍營房
田地俱聽臣等另行該道查議徑自酌處右營
既改協守其遊擊陳嘉寵別用聽兵部另查相
應員缺陞調再照領右二營官軍皆遠調於河

東各營堡歲一更番而馬價有限不能遍及每至期徵調即責各軍買馬赴操有倒死者寧前道始照例給馬價買補臣驗其更番之馬往往不堪戰陣軍以馬故輒累及其餘丁族屬及至營遇警不過撥之分防城堡而已馬既不堪戰而養馬適以累軍馬死又費物價若分防城堡則無如火器之利今方務練火器無非取諸額軍之內而不得更議增兵則不如減馬數而練火器之為便也合無將中右所遊擊營調操馬軍一千五百名內減馬五百匹前屯備禦營調

操馬軍五百名內減馬二百匹二營減馬步軍
七百名專習火器防守不許別項差役其各存
馬軍務驗壯大戰馬騎操以便防禦應援此可
責實效而實無裁省者也伏乞

勅下該部再加查議如果臣等所言可行覆
請定奪施行為此具本謹題請

旨

勦處逆酋錄有功死事人員

題為奉

旨勦處逆酋官兵奮勇攻擊斬獲首虜應錄有功死
事人員以勵人心并自陳不職乞

賜罷斥以警邊臣事案照萬曆十五年十等月內
節准兵部咨為屬夷蓄謀報怨屢諭不聽逆狀
已著懇乞

聖明早賜勘處以安孤鎮事該遼鎮督撫官張
等會

題逆酋逞仰二奴之子卜寨那林孛羅糾合西虜

聲言報讐搶殺王台子孫猛骨孛羅歹商夷寨
與酋婦溫姐及康古六等謀為內應意滅歹商
乘機入犯開原地方節經該道宣諭不聽隨行
叅將李宗召等統兵救援即將溫姐拏出釋放
責令講和復將康古六擒綁監候請

旨緣由該本部覆議題奉

聖旨是邊務夷情朝廷惟責成督撫總兵相機行事
巡按御史止是紀覈功罪不必避嫌畏事致悞
軍機欽此欽遵又為屬夷叛逆孤鎮益危查叅
兵備官員以明禍本事該臣與巡按御史許守

恩會

題逆酋那林孛羅等結連西夷恍惚太等并屬夷
猛骨孛羅攻圍歹商夷寨隨該官軍出關救援
猛骨孛羅將本寨房屋燒燬催迫溫姐并部夷
投赴北關那林孛羅去訖及叅開原兵備王某
緣由該本部覆議題奉

聖旨這夷情着該督撫等官遵前旨相機行事王某
玩寇養患着錦衣衛便差官校扭解來京問欽
此欽遵又准總督軍門咨前事內稱猛骨孛羅
等逆狀已張勦除應速乃向因該道反覆之詞

致事體久未決定今既兩次奉有

明旨亟應相機勦除等因又為軍務事內稱歹商部落貌處南關新遭猛骨孛羅等攻劫之患尚無固志所恃者惟我為之保庇耳尤宜飛檄開原守將并諭歹商等衆各宜萬分加謹以防北關諸虜乘機掩襲之禍或駕言備禦入犯大虜一面整搦兵馬一面偵探北關動靜苟有一隙可乘即便直搗其穴使疾雷不及掩耳亦一策也等因又准本部咨為浮詞亂實邊計未明懇乞聖明特諭督臣親按遼鎮以決撫勦機宜以便查覈

功罪事該臣題該本部覆議恭候

命下移咨薊遼督撫等官張等督同總兵官李

成梁及各文武將吏一應勦處那林孛羅卜寨
及猛骨孛羅溫姐等遵奉前

旨相機行事無得致悞軍機總待事完之日有功有
罪員役悉聽巡按御史嚴覈具

奏覆

請定奪等因題奉

聖旨這夷情已該督撫等官定議會同着李成梁顧
養謙協心遵旨行事張國彥從宜調度毋得疑

慮推諉致悞邊計欽此欽遵又准軍門咨前事
內稱夷馬正弱勢有可乘形聲未彰敵未知備
速統銳師出其不意則逆夷可除歹商可安海
西之事可定若猶豫後時比及草青馬壯虜勢
一強恐難為力矣事干機宜亟行密切速舉等
因俱各備咨前來已經會行鎮守總兵官寧遠
伯李成梁及備行開原道將各遵依去後萬曆
十六年三月二十一日據整飭開原兵備山東
按察司副使成遜呈據遼東鎮坐營中軍金承
武呈稱先蒙軍門差委原任總兵官王尚文查

閱邊工遇警隨營又蒙撫鎮明文會將前鋒哨
探副總兵李平胡前鋒裏家丁副總兵李寧李
興前鋒外家丁遊擊張世爵胡尚忠秦得貴選
鋒遊擊胡鸞副總兵查大受等兵馬前赴河東
遼陽迤南海州迤北一帶地方關支巡撫顧都
御史預發銀買料豆養馬以待又蒙本院隨會
巡按許御史將廣寧事宜備行兵備鮑副使及
管正安堡車營遊擊事副總兵姚大節并廣寧
備禦王紹芳嚴督存城兵馬朝暮巡守鎮城以
備不虞又會行寧前兵備王僉事并叅遊及錦

義諸將比常萬分加謹哨備即會分選鋒左營
遊擊唐伯美遊兵左營管遊擊事叅將塗寬及
標下中軍原任遊擊蔣位等各帶領兵馬跟隨
巡撫顧都御史於二月十二日赴遼陽城料理
李總兵帶領本職并旗鼓千把總王通馮文用
陳一諒趙維藩盧得功等兵馬仍令千把總劉
應德王評趙國禎等督令步軍推挽戰車三百
兩亦於本日未時起行赴海州等城駐防仍傳
調寧遠叅將營千總王宗堯廣寧右遊擊營千
總張與功中後所遊擊營千總楊暉每領精銳

軍丁二百名義州叅將營把總李國卿領家丁一百名正安堡車營千總張應秋領軍丁一百五十名及順帶鎮武堡遊擊營原任備禦蔣國光領軍丁五十名又行金復海蓋兵備郝叅政海州管叅將事副總兵孫守廉督選復州叅將營新練火器併傳調叅將佟養正蓋州備禦王綬各帶領馬步官軍俱赴遼陽更挽戰車又蒙顧都御史李總兵會議即今雪大泥深兵馬難行比至夷寨夜黑行兵不便稍待月色大明道路乾爽以便進擊至三月初三日新月方升審

時可進撫鎮各起行述遞進發行會分守邊備
栗叅政開原兵備成副使順調遼瀋鐵嶺寬奠
副叅遊守備禦楊燮王維貞劉仲文黃應魁張
朝臣王印修養中趙之牧彭國珍董文貴崔吉
宿振文等馬步官軍又添調戰車二百二十兩
合營同進至十三日到開原先時成副使日夜
籌備嚴防康古六以招溫姐猛骨孛羅時諭二
酋以通

貢和好免其殘害布間謀禁洩露專候大兵以除
兇孽乃與撫鎮先議於鐵嶺繼與李總兵復議

於開原東郊李總兵將兩河兵馬戰車分布派
撥貼寫營圖以將領備禦中軍千把總李平胡
李寧李興孫守蕪查大受王維貞塗寬張世爵
胡尚忠秦得貴唐伯美胡鸞吳希漢劉仲文黃
應魁蔣位高良弼等為馬營以秦得倚李得全
等督陣又以李志榮李琦等各執旗監督將領
備守中軍千把總等官楊燮傅士忠佟養正等
為車營以閑住將領等官唐朴戴朝弁等各執
旗監督霍九皋岳嵩往來總督李總兵統領本
職并旗鼓王適前後調度預先頒示號令一官

兵出塞專為擒勦酋孽并除黨惡以彰

天討以靖地方正臣子報

國之時凡我官軍悉宜各遵軍令同心奮勇極力
攻勦敢有臨陣退縮故違節制者斬首以徇一
大兵進剿預有派定營圖直抵巢寨先行宣諭
以示恩威若賊心服効順待以不死罷兵安撫
如執迷不服然後聲罪致討進兵之時即遇有
奔寨夷人及星散零住者不許擒殺一夷敢有
故違督陣官旗當即拏赴軍前違犯軍丁梟示
千把總管隊各綱打一百將官定以軍法會處

一孽酋城寨甚堅設備已久大兵征剿或背城死戰悉出迎敵官軍即當力櫻賊鋒奮勇斫殺若貪割首級擁壓爭奪及貪搶財物敵必乘機反攻僨事匪細敢有擁壓貪割一級搶取一財一物者軍丁即時梟示千把總管隊排伍貫耳割鼻面營細打一百大棍將官以軍法從事仍會叅重處一攻打城寨全仗火器威力放打安置尤要如法隨用隨繼不容間斷至於人力有限亦不可漫擁急攻竭盡筋力疲憊莫繼今已編有次第按數調攻更番迭進各宜遵守軍紀

聽令以待敢有故違撓越混亂千把總管隊當
以軍法網打將官亦以軍法從事一此番剿滅
夷人歹商領部悉從先各給以白布袋一條令
肩披為號以便識認官軍臨陣各要辨此敢有
乘其混殺妄誅一夷者查出犯軍抵罪千把總
管隊各細打一百大棍將領以違律會叅重處
一賊寨攻破中有婦女幼夷原係無辜惟剪渠
魁以明

天討殄黨類以絕禍源婦女何為幼小無知皆在可
宥示諭官軍家丁婦女不許殺戮夷種年十五

歲上下亦不許一槩混殺俱許生拏回營照例
給賞敢有違殺婦女幼夷不惟功不准驗犯軍
細打一百大棍將領千把總管隊悉以軍法從
事一官軍血戰軍丁有陣亡者敢有將死屍割
取報功查驗得出本犯及千把總管隊即時梟
示為例將官先以軍法從事仍會叅重治若攻
破城寨遇有被虜漢人俱許救回照例以斬獲
論功敢有殘殺希圖混報為首抵罪千把總管
隊一體連坐將官會叅重處一官兵出寨行營
下營各隨標隊不許錯亂喧嘩夜晚下營卒有

賊兵衝突尤當不動如山以靜制亂敢有驚擾
離次當即梟示千把總管隊隊伍一體連坐將
官亦以軍法從事一標旗頂纓書名之製所以
分別營哨以辨形名此用兵之至要也業已一
諭行矣誠恐姦猾軍丁暮夜行營臨陣交鋒
將頂纓旗不行插戴故違軍令督陣旗牌人員
許即拏赴軍前割去耳鼻回營細打一百大棍
千把總管隊一體究治將官亦以軍法從事一
境外交鋒如有陣傷陣亡軍丁各管隊同夥務
要扶救馱載回營不許丟棄在外敢有故違查

出千把總管隊排伍同夥網打一百大棍將領
定以軍法從事各營分發俾知遵守訖仍於開
原東郊按隊劄營將各將領中軍千把總等官
畢集師次李總兵面以軍令再加宣諭各將唯
唯傳布三軍皆歡呼踴躍至日晡兵行是夜從
開原該管威遠堡小關門臺出境十四日黎明
抵賊寨二酋各一大寨居住相去數里卜寨預
先丟棄空城般歸那林孛羅山城併力拒守其
外大石城石城外木柵內又木城內外大壕三
道其中央據山壘石為城石城內又立木城上

下內外共城四層木柵一層石塊滾木甚備賊衆精兵萬餘各執弓矢器械一半披甲見兵呼躍出迎拒敵環住達賊羅列道傍李總兵嚴諭將吏官軍遵守軍令不許殺戮一人不意賊酋即行橫肆斫死擺撥軍丁朱祿等三名李總兵方令官軍家丁一擁敵斫火炮火箭齊力射打混戰一處各賊力不能支趨退入城各有損傷我兵即有斬獲李總兵將車騎列營四合匝圍仍豎受降旗一面令通事與各酋講話招撫你等連年讐殺南關兵連禍結何日是了又連結

西虜圖滅歹商侵犯內地是你自尋誅戮屢經
宣諭執迷不聽今

朝廷令撫鎮親統大兵宣諭你等若悔過學好情
願歸降兩關講和永不相害可率領小頭領部
落站立受降旗下面見撫鎮二堂與你等回
奏你等與南關歹商同康古六猛骨孛羅溫姐鑽
刀起誓驗馬

進貢

朝廷還有大賞你等若不降順打破城寨盡數屠
殺悔之何及二酋再四不聽矢石如雨李總兵

下令官兵四面攻擊顧都御史差官催督車營
火器分番迭進原任總兵王尚文原任遊擊吳
大績所領家丁素練火器督率放打炮火震天
呼聲動地賊酋倚附柵柞迎鋒力拒我兵又連
斫數陣賊酋進而復出更番迭戰我兵蟻附柵
寨賊酋矢石交飛滾木齊下我兵損傷甚多死
不敢退斬獲賊級亦多是日計斬首三百二十
三顆內王尚文手刃三級日晡收兵入營夜宿
傳籌枕戈擐甲以防突出至次日天明李總兵
開營復申嚴號令務期攻破各兵益勵氣奮勇

攻打盡力攻開賊城二層撤去外柵一層計又
斬首二百三十一顆賊退內城拒守其內城高
堅我兵仰攻又被大石滾木擊打先登軍丁輒
打死傷日暮收營至夜天復落雨連攻二日賊
酋因見火炮打壞城垣直達城中八角樓所經
之處人死壁穿賊始喪膽滿城哭聲動地二酋
乃求我兵稍退出城下馬遙叩乞哀情願與歹
商講和效順

中國告乞罷兵李總兵度賊山城甚險勢尚衆強
我兵不滿二萬道路遙遠兩雪泥凇開原又歲

歟無糧我兵饑勞故因其乞哀姑且聽從遂集各將吏面議下令收兵仍諭軍中不許復窺各夷審糧旋師於十六日申時從原口入境再照二酋雖畏威乞哀願講和效順但桀悍素著狡詐叵測難保無虞除行地方官員比常萬分加謹及查在陣前後共斬獲首級五百五十四顆內通事高應奎等認出王仲臣等斬賊首把當亥等首級八顆挈回被虜漢人男婦八名口得獲達馬九十八匹盔二百七十五頂甲二百八十一副臂手八十三副陣亡官軍陳勲等五十

三員名被傷官軍吳希漢等五百三十五員名
射死官馬一百一十三匹官軍各回城堡防禦
等因呈報到道據此除首級夷器等件仍令中
軍金承武等分別首從并管哨官員職名徑自
解赴巡按衙門紀驗具

題外等因到臣又據坐營中軍金承武開原管叅
將事遊擊吳希漢等各呈報相同據此除先已
於本月十七日塘報兵部軍門并陣亡被傷官
軍先行優恤外臣會同鎮守總兵官太保兼太
子太保寧遠伯李成梁議照開原二奴遺孽部

議明盡臣等屢奉

明旨相機行事非不知兵貴神速思滅此而朝食也而去秋土蠻及三衛之虜窺我兩河之間正急士馬分馳日夜為備不給大帥安得置兩河不顧而提兵以東也臣嘗曰待時者待二三月間西北之虜馬弱遠塞大營之兵乃可東耳而是時康古六擒猛骨孛羅叛歹商益孤危海西南關之事已零落不可收拾而北關二酋那林孛羅卜寨者計已售而勢益張使其果知吾計出於勦則合猛酋而殲歹商日犯內地何所不至

曠日持久吾機洩而彼亂成即所謂待時者安
所施也臣故縱前所禽那林字羅部夷湯松哈
者以示撫內居歹商以寢諸酋之謀放還康古
六於開原以收其所妻父妾溫姐收溫姐以繫
其子猛酋故猛酋溫姐尚居近邊聽處分無遠
遯心北關二酋亦觀望而不敢遂其惡會兵備
王某奉

旨逮繫臣恐諸酋震驚生變使人揚言某以不善撫
夷故被逮而令副使鮑希顏趣行赴開原代其
事鮑希顏至開原日夜為晝而出之鎮靜安閑

若不經意者諸酋益安及開原副使成遜至身
任其事其處勢危而用心苦巨謀纖計動中機
宜故諸酋若有所維繫帖然不動以迄於今也
先是鎮臣李成梁謂臣曰歲饑士馬俱困今河
以西斗米價至三錢豆亦斗二錢即有舉動貧
軍自食不給何以飼馬是時河東稍收臣於是
發銀五千兩分之海蓋道叅政郝杰分守道叅
政栗在庭令之南自海州北抵蒲河三百里之
內處處糴豆貯之倉而發大營之兵家河東者
使就食為防因以飼馬用是軍所食穀賤於河

西不啻半馬食豆於官軍不累而馬以肥然臣
與鎮臣提大兵而東恐兩河之虜有乘我虛而
竊發者故於正月密咨軍門請發南兵火器名
為搗寧前之虜而疑諸虜使之遠徙而不敢近
吾塞是時軍門飛檄屢至又密授以方略臣與
大帥奉行惟謹會河東人載黍穀趨利廣寧價
稍平臣以市價糴之三千餘石積貯以備賑臣
與鎮臣於是以二月十二日統兵數千及降夷
二百人俱東十四日抵海州而道路以冰雪漸
消多沮淖人馬陷足沮淖中輒一二尺許膠不

可拔其来自寧前者已行五六百里疲勞甚而南衛新練步卒當挽車者尚未集鎮臣曰我兵擊虜利月明今途多淖士馬饑勞而車益難進計程刻日抵開原月當漸沉若倉卒赴闕而先自疲是天時地利人和三者無一矣非策也於是乃卜二月三月孰為吉卜則三月吉鎮臣乃以數千騎止海州臣以數千騎止遼陽以待而軍無見糧臣前所糴豆亦已盡於是乃發海州遼陽倉穀以餉軍豆以飼馬凡二十餘日而士飽馬騰矣臣又念發兵時不知其久今師出已

久而廣寧穀又貴於是行分巡道盡發臣所糴糧三千餘石給士卒降夷從征者之妻子而使之無內顧適薊餉三萬至廣寧則以萬金隨軍以便濟急蓋軍不告匱則約束易施而所經過可無犯秋毫也初未發廣寧時臣數叮嚀大帥謂開原諸酋終屬夷耳今雖以叛逆故加兵終不可盡誅而盡誅之是自撤藩籬而墟其地也地為墟我不可守必招致他虜去諸酋而致他虜是去犬羊而致虎狼也於邊疆計非便今不如以剿為撫兵進時毋妄殺一人妄殺者抵死

必不得已而後加誅焉使其懾威而乞撫度其可撫則撫而還此

天王仁義之師而大帥之德也功在邊疆

社稷不數一切首功且也後必無貪功之譏大帥深以為然於是作軍令令軍中不得妄殺一人其目如前所云臣又數諭諸將諸將唯唯各以軍令令其軍無不慄慄者三月三日大帥自海州趨遼陽會臣曰可矣居兩日再申前令而副使成遜數以密揭促師最後言歹商部夷饑甚乞賑賑以倉穀五十石臣恐賑歹商不賑猛酋是

黑白分矣猛酋必遠遯而其部夷且驚散故令
並賑猛酋如其穀數以示待之如反商而安其
部夷以故諸酋與其部夷皆益安三月六日自
遼陽發而北以數雨雪多淖如前而恐其洩兵
不留行矣十三日至開原邊是夜即出第專有
事北關二酋而置南關猛酋不以匹馬入其境
盖先所急而恐傷南關部夷也部夷無罪故也
兵行三十里至落羅寨落羅者小酋首之名北
關酋部落也其寨去二酋所三十里大帥使人
招落羅落羅出聽招大帥以一降旗豎其寨門

令一材官率甲士十人守之我軍不得入其寨
取一草而挾落羅與其騎三人隨行使傳諭二
酋出降降者得不殺如落羅而不取其一草是
時卜寨已先棄其寨入那林孛羅大城中併力
守其衆奔大城者夾道馳與我軍相雜我軍不
敢殺一虜二酋恃其險不聽諭而揮其馳騎連
殺我三人又揮其甲士直前衝我軍大帥始縱
兵擊虜遊擊吳希漢首當其鋒面中大矢創甚
其弟希周挺身救亦被大創而斬虜騎之射希
漢者我軍如牆而進直抵其城下虜退入壁閉

門拒守矢石下如雨我軍多死傷其外大城以石石城外為木柵而內又為木城城內外大壕凡三道其中堅則一山特起鑿山坡周遭使峻絕而壘石城其上城之內又為木城木城中有八角明樓則其置妻子資財所也上下內外凡為城四層木柵一層其衆控弦之士以萬甲冑者以千計刀仗矢石滾木甚具我兵攻之兩日徹其外柵破其城二層其中堅堅甚不可破而我仰攻先登之士輒死其大石滾木大帥乃急下令收兵而以大砲擊其中堅凡再發砲內有

勅入

重八斤鉛彈彈所經城壞板穿樓大木斷壁頽而中多洞冒死者於是滿城老幼婦女皆號泣我軍復以車載雲梯如樓櫓直立之與其中城齊欲置大砲其上擊中城虜皆喪膽二酋始出城下馬乞哀叩大帥求生且即欲與南關分

貢不復敢叛大帥以其本為屬夷今又畏威乞降殺之不武而滋議故許之降二酋又言果不殺我者願燒雲梯勿復擊大砲毋盡發我窖糧大帥度雲梯重挽車者疲不能還乃燒之止大砲

不復擊而令軍中毋復發其窖糧遂罷兵而還
斬首虜五百五十四級救回被虜八人而官兵
死者五十三人然非畏我大砲則虜必據險相
持老我師籍外援為變計安肯委心乞降效順
也所謂大砲者發自軍門製自永平叅政葉夢
熊者也夫使其盡吾之技即破其中城無難而
墟其地自撤我藩籬後必多事且虜必鬪而死
不無損我精銳首虜當以萬計其所費

帑藏又何可勝道皆非所以體

國而安邊也今收兵不攻示有餘勇燒雲梯止大

砲不復擊示有餘威而留其窖糧示餘恩以終
事使臣得執詞措手以行吾之撫而為久安之
計兵可不再試於東此大帥之忠勇兼濟而仁
智並施也臣以為此之為功當不在數萬虜級
下而大帥益逡巡退讓不敢言功此當量其心
而成其讓者也若開原道副使成遜甫任衝邊
即有大事機圓而縝密不洩心苦而危險獨當
始協剿謀終收撫筭分巡道副使鮑希顏誠心
任事發策中機當反側未定之時收鎮靜不驚
之效事雖未竟績實有由此二臣者均應紀錄

者也若管開原叅將事遊擊吳希漢身先士卒
當虜之衝面中大創氣不為沮且其籌畫擔當
已非一日應聽部議斟酌優錄開原備禦王汝
徵責任撫夷綽有機變內外賴以調停始終効
其謀諍似當加賞仍應紀錄若副總兵楊燮李
平胡王維貞孫守庶李寧李興查大受叅將塗
寬佟養正遊擊劉仲文黃應魁唐伯美胡尚忠
塗廣胡鸞李應時守備高良弼備禦李繼武高
貞正兵營旗鼓王邇各盡心於半載之間共効
力於兩日之內本當分別優叙但或見任管事

或加銜向用每有功勞輒蒙

恩澤是役也皆願報

主上深恩不敢受

賞臣故不敢議賞均應紀錄若坐營中軍金承武
傳宣號令給散糧餉分布之勞巨細必經奔走
之苦晝夜不息臣所目擊臣甚憐之似應優錄
加賞仍聽遇缺推用臣標下中軍原任遊擊蔣
位進兵則軍中之令挺身申飭還師則落羅之
寨盡心保全耿直不阿勞怨能任似應復其原
任職銜以待用若原任協守副總兵秦得倚奮

臂當先身中七矢雖甲厚不至重傷而勇敢亦可緊見原以病免今已病痊應候相應叅遊員缺帶銜推用原任遊擊李如梧官以避嫌得裁身實隨營効力應於別鎮推用若原任叅將熊朝臣原任遊擊史儒秦得貴張世爵雖置閑各自有由而材武終難盡棄况俱隨營日久且其勞績亦多此番戰鬪並為先鋒大營之中皆不可少似應各復其原任職銜與加銜將官並立以便督領軍士若原任總兵王尚文原任遊擊吳大績並屬南人精於火器攻擊之際為力實

多在王尚文應查其功次照例議處在吳大績
應資其教練另議取用至於死事者領哨捕斬
有功者皆屬卑官小卒聽指揮而効死力自當
照例陞賞以為勸者也臣於諸臣所不敢過擬
者非沒其勞也明剿之非得已也不可誇首功
於屬夷而開兵端啓倖門也若夫諸將士之勞
所謂焦頭爛額者耳不早為曲突徙薪之計而
使將士得成其焦頭爛額之功此正臣之罪也
蓋既名為屬夷則當主撫即不聽撫亦當早為
之圖臣居廣寧距開原七百餘里未嘗目擊情

狀而惟該道是憑止緣入境之初本兵大臣有
撫臣不宜出巡之議其說甚長其意甚善遂恪
守之而連歲大侵不可輕動一切撫剿悉委計
於王某竟養成二酋之勢至於如此今雖仰仗
皇上神武威靈二酋稽首乞降猛酋母子亦且投見
俱願和歹商入

朝貢為我藩籬如故而業已勞師費財損我銳卒
不為不多事矣王某已褫其職矣臣獨可儼然
在位耶伏乞

勅下兵部錄有功死事者而斥臣以明罰則賞罰明

而邊臣有勸懲矣除將善後事宜容臣等議處
安妥另行具

題外緣係奉

旨剿處逆酋事理未敢擅便為此具本謹題請

旨